

字典

字學典第一百十五卷

書家部法書名家列傳二十一

元二 黃潛

按元史本傳黃潛字晉卿婺州義烏人延祐二年進士第授台州寧海丞入爲應奉翰林文字同知制誥陞侍講學士贈江西等處行中書省叅知政事追封江夏郡公諡曰文獻 按書史會要黃潛書宗薛晉公而自成一家人危承旨嘗云吾平生學書所讓者黃晉卿一人耳

柳貫

按元史黃潛傳潛同郡柳貫浦陽人字道傳始用察舉爲江西儒學教諭仕至翰林待制與黃潛及臨川虞集豫章揭傒斯齊名人號爲儒林四傑所著有字系二卷 按浦陽人物志柳貫善楷法工篆籀妙處不減李陽冰 按書史會要柳貫於大字得體 按六研齋二筆柳道傳行書縱橫適逸亦鮮于之亞也

張鐸

按元史張起巖傳起巖高祖迪迪生福福生東昌錄事判官鐸

按歐陽元張公先世字碑宣卿一字仲宣

按圭齋集

宣卿工書得黃豫章米襄陽法筆

張範

按元史張起巖傳起巖高祖迪迪生福福生鐸鐸生四川行省儒學副提舉範

按圭齋集範善

吟咏富著述能大小篆隸行楷皆遒勁有體

張起巖

按元史本傳張起巖字夢臣年弱冠以察舉爲福山縣學教諭中延祐乙卯進士除同知登州事改集賢修撰拜翰林學士承旨諡曰文穆博學有文善篆隸

王士熙

按書史會要王士熙字繼學東平人官至江京廉訪使贈中書平章政事封趙國公風流蘊藉爲名流所慕書法亦清潤完整

王士點

按書史會要王士點字繼志士熙之弟官至四川雲南廉訪副使善大字亦能篆

王士弘

按元牘記王士弘與虞集同時重修方山定林寺碑虞集撰王士弘書

陳旅

按元史本傳陳旅字衆仲興化莆田人篤志於學虞集見其所爲文延至館中朝夕以道義學問相講習自謂得旅之助薦除國子助教遷國子監丞 按書史會要旅善古隸行楷亦有法

陳繹曾

按元史陳旅傳旅同時陳繹曾字伯敷處州人爲人精敏異常諸經註疏多能成誦文辭汪洋浩博官至國子助教 按書史會要繹曾學識優博真草篆隸俱通習之各得其法 按胡雲峯集

陳伯孚善飛白如塵縷遊絲秋蟬春蝶

朱德潤

按書史會要朱德潤字澤民吳郡人征東儒學提舉 按六研齋三筆德潤文采斌鬱字畫迥麗

亦韻頗鮮趙

鄭元祐

按蘇大年遂昌先生鄭君墓誌銘鄭元祐字明德遂昌人兒時乳嫗提攜右臂脫髀左手寫楷書規矩備至世稱一絕又自名尙左生至正十七年授平江路教授陞江浙儒學提舉

顧安

按東圖元覽顧安字定之東淮人爲泉州路判官大字遒勁法趙承旨

郭畀

按鎮江府志郭畀字天錫丹徒人爲饒州路鄱江書院山長調平江路吳江州儒學教授未上江浙行省辟充掾史書法出入趙文敏

莊麟

按鎮江府志莊麟字文昭江東人居京口書畫詩文亦婉雅與郭畀齊名

蘇壇

按寧波府志蘇壇字伯清眉山人至大元年爲寧波教授善書工詞藻德望偉然

陸友

按吳中人物志陸友字友仁博雅好古工漢隸八分書尤能鑒辯三代漢魏而下鍾鼎銘刻晉唐法書名畫皆有精識嘗至都下虞奎章柯博士皆善其書言於上未及任用而歸 按書史會要陸友好古博雅真草篆隸皆有法 按墨史友仁追蹤石經欲與蔡鍾相上下嘗書八分小篆歌如昆刀切玉不見形迹而剛強之氣溫潤之質望之儼然

楊益

按道園學古錄楊益洛陽歷行臺御史轉員外郎出府南雍 按書史會要楊益古隸學廬江太守碑亦能篆

孫履常

按道園學古錄環翠亭記云臨川李氏作亭曰環翠其鄉先生孫君履常氏書程伯子所賦環翠亭詩於其上

朱侯

按道園學古錄題朱侯所臨智永千文云國朝吳興趙公遂擅一代學者瀾倒忽見朱侯作此古法令人執卷惘然

皮槩

按道園學古錄皮槩字維楨清江人

虞集之甥

以文學稱於鄉翰墨似舅氏

趙良佐

按淵穎集趙良佐字子有喜讀書善行草

廖穀

按淵穎集廖穀字弘道建康人能書善爲文

吳正

按書史會要吳正道番陽人世爲儒家深好篆學著六書源淵字偏旁誤辯存古韻譜等書吳文正爲序之

王肖翁

按黃文獻公集王肖翁字傅朋金華人起家衢婺二郡儒學錄大德中陞婺郡儒學正以松江府判官致仕高懷雅興一寓於詩而尤善筆札論者謂其酷似吳傅朋短章醉墨人爭寶愛之

戚崇僧

按黃文獻公集戚崇僧字仲咸金華人不以榮進爲念從鄉先生許公講道於八華山扁其室曰朝陽人稱朝陽先生以大書之學世儒不講所傳經籍之文多致譌舛乃用古篆繕寫易書詩儀禮春秋孝經論語大學中庸孟子將獻於有司以禮儀一經未旣弗及上

張淵

按松陵文獻張淵字清夫吳江人博學好古有詩名尤工書法皇慶中以薦爲京省提舉

月魯不花

按墨林快事元重修學記黃潛撰文月魯不花書筆畫甚古雅

鄭銳

按圭齋集鄭銳字敬敏其先榮陽人遷浦江幼穎悟日記數千言長明春秋暇日習詩及小楷殊有思致延祐甲寅以明經貢於鄉

張恕

按浦陽人物續記張恕字如心浦江人舉明經歷任武陵東陽慶元學正素與吳萊柳貫友善書體莊勁得八分之正

姚子敬

按吳禮部集姚子敬吳興人人品高勝其書自楊凝式上派王大令翛然埃壒之表

沈璜

按游居錄沈璜字伯玉元刻趙文敏集乃其所書字極精工世以爲文敏親筆非也

周仁榮

按元史本傳周仁榮字本心台州臨海人工爲文章用薦署美化書院山長泰定初召拜國子博士遷翰林修撰陞集賢待制賜諡號曰康節先生 按書史會要仁榮以文章名而楷書宗歐陽率

更尤爲時所重

薛漢

按魯子翬墓誌薛漢字宗海永嘉人幼力學有令譽泰定元年選國子助教詩律書楷嚴縝有法而慎慤不矜按書史會要薛漢楷書宗歐陽率更

薛植

按書史會要薛植字子立漢之子精於楷書一點畫不苟殊有率更體格

柯九思

按稗史集傳柯九思字敬仲台州仙居人遇文宗於潛邸及卽位置奎章閣特授學士院鑒書博士凡內府所藏法書名畫咸令鑒定賜牙章得通籍蒙署流寓中吳又善鑒識金石鼎彝之器時吳人陸友號爲博物亦歎以爲不及按書史會要柯九思能詩文亦善書

脫脫

按元史馬札兒台傳馬札兒台長子脫脫字大用天曆元年襲授成製提舉司至正元年爲中書右

丞相封鄭王

按圭齋集脫脫字畫方毅酷似顏真卿

按書史會要脫脫善大字

也先帖木兒

按元史馬札兒台傳馬札兒台次子也先帖木兒爲御史大夫陝西行臺監察御史

按書史會

要也先帖木兒亦能大字

趙世延

按元史本傳趙世延字子敬其先雍古族人居雲中北邊天資秀發喜讀書究心儒者體用之學弱冠世祖召見入樞密院御史臺肄習官政授承事郎雲南諸路提刑按察司判官天曆二年拜中書平章政事封魯國公改封涼國公贈太保諡文忠

按燕都遊覽志京嶽廟昭德殿碑天曆元年

趙世延書

李洞

按元史本傳李洞字漑之滕州人姚燧力薦於朝授翰林國使院編修官天曆初超遷翰林直學士俄特授奎章閣承制學士其爲文章奮筆揮灑意之所至臻極其妙尤善書自篆隸草真皆精詣爲

世所珍愛 按書史會要李洄書有晉宋家法

不花

按元史楊朶兒只傳楊朶兒只子不花好讀書善書仁宗聞而召之應對稱旨欲以爲翰林直學士力辭後以蔭補武備司提點天曆初除通政院判贈禮部尙書

哲理也臺

按姑蘇志哲理也臺色目人寓居吳中登天曆元年進士善書法

楊瑀

按松江府志楊瑀字元誠錢唐人警敏博學天曆間召見奎章閣命篆洪福明仁璽文稱旨署廣成局副使終建德路總管謝政居松江之鶴沙趙仲穆爲寫竹西圖

朶爾直班

按元史本傳朶爾直班字惟中年十四見文宗適將幸上都親閱御衣命錄於簿顧左右無能書漢字者朶爾直班引筆書之命爲尙衣奉御尋授工部郎中至正元年除翰林學士俄遷中政使拜中

書平章政事喜爲五言詩於字畫尤精

按書史會要朶爾直班官中政院使日嘗奉敕書鄧文

肅公神道碑

杜本

按元史本傳杜本字伯原清江人博學善屬文隱武夷山中文宗徵之不起右丞相脫脫以隱士薦召爲翰林待制至杭州稱疾固辭致書於丞相遂不行工於篆隸學者稱爲清碧先生 按墨史杜公書方正嚴重如通經巨儒進止有法 按輟耕錄杜本有所編五聲韻自大小篆分隸真草以至外番書及蒙古新字靡不收錄

歐陽元

按元史本傳歐陽元字原功其先家廬陵遷居瀏陽延祐二年進士授岳州路平江州同知召爲國子博士至元五年拜翰林學士承旨封楚國公諡曰文 按書史會要歐陽元行草略似蘇文忠而剛勁流暢風度不凡未易以專門之學一律議之

馮子振

按書畫史馮子振字海粟官至翰林學士雖不以書名其筆法似宗黃山谷

段天祐

按書史會要段天祐字吉甫汴人官至江浙儒學提舉亦號能書

魏敬益

按書史會要魏敬益字士友洛陽人官至臨江總管古隸學廬江太守碑亦能篆

李孟

按潞州志李孟號秋谷至元中爲平章政事字法邁勁

智受益

按鄧州志智受益鄧州南陽人以善書負時望至元中擢荆湖行省都事終兩浙轉運使

張德琪

按書史會要張德琪字廷玉燕人草書學張長史行書亦佳

牛麟

按書史會要牛麟字伯祥太原人大字尤爲時所稱美

趙鳳儀

按書史會要趙鳳儀字瑞卿號怡齋汴人官至京畿都漕運使練達吏治善扁榜大字

傅若金

按書史會要傅若金字汝礪新喻人官至廣東廉訪照磨長於詩正書學歐陽率更

蘇天爵

按元史本傳蘇天爵字伯修真定人釋褐授大都路薊州判官改翰林國史院典籍至正七年拜江浙行省參知政事九年爲兩浙都轉運使爲文長於序事詩尤得古法學者因其所居稱之爲滋溪先生
按書史會要天爵書學趙魏公

王都中

按元史本傳王都中字元俞福之福寧州人以恩授南劍路順昌縣尹元統初以正奉大夫行戶部尚書兩淮都轉運使尋拜河南行省參知政事贈昭文館大學士諡清獻自號本齋
按書史會

要都中以廉介自持爲政簡而不煩大字似其爲人小字亦善

王畝

按書史會要王畝字季野都中子官至成都路判官清峻有高譽真行草師二王度越流輩

張翥

按元史本傳張翥字仲舉晉寧人以詩文知名一時至正初召爲國子助教以翰林學士承旨致仕
按書史會要張翥蚤年書學鍾元常

汪澤民

按元史本傳汪澤民字叔志婺源州人延祐五年登進士第授同知岳州路平江州事至正三年召赴闕除國子司業與修史書成遷集賢直學士以禮部尙書致仕追封譙國郡公諡文節 按潛溪集澤民爲文不事繪飾詩亦清婉尤以善書名家

貢師泰

按元史本傳貢師泰字泰甫寧國之宣城人泰定四年釋褐出身授太和州判官擢應奉翰林文字

至正二十年除戶部尚書以文字知名

按書史會要師泰楷書亦善

泰不華

按元史本傳泰不華字兼善伯牙吾台氏初名達普化文宗賜以今名年十七江浙鄉試第一明年賜進士及第授集賢修撰至正十一年遷浙東道宣慰使追贈江浙行省平章政事封魏國公諡忠介善篆隸溫潤遒勁嘗類復古編十卷攷正訛字於經史多有據云 按書史會要泰不華篆書

師徐鉉張有稍變其法自成一家行筆亦圓熟特乏風采耳常以漢刻題額字法題今代碑額極高古可尙非他人所能及正書宗歐陽率更亦有體格

烏古孫良楨

按篁墩集烏古孫良楨字幹卿號約齋元中書左丞字流麗在子山伯機之間

余闕

按元史本傳余闕字廷心一字天心廬州人元統元年賜進士及第授同知泗州事俄召入應奉翰林文字至正十七年拜淮南行省右丞追封幽國公諡忠宣留意經術爲文有氣魄詩體尙江左篆